



Coimisiún
na Meán

Micri-chiste 2026 um Litearthacht sna Meáin le Cur i gCoinne na Bréagaisnéise (Snáithe A)

Treoirlínte agus Critéir Iarratais

Dáta Foilsithe:
3 Meán Fómhair 2026

Spriocdháta le haghaidh freagra:
9 Deireadh Fómhair 2026



Clár

1. Réamhrá	3
2. Maidir le Coimisiún na Meán	3
3. Cad is litearthacht sna meáin ann?	3
4. Comhthéacs an Mhicri-chiste um Litearthacht sna Meáin le Cur i gCoinne na Bréagaisnéise	4
5. Cuspóirí	4
6. Incháilitheacht	4
7. Maoiniú atá ar fáil agus samplaí de ghníomhaíochtaí	5
8. Cad iad na riachtanais chun iarratas a dhéanamh?	5
9. An próiseas iarratais / Cad a tharlaíonn tar éis dom m'iarratas a chur isteach?	6
10. Measúnú Cáilíochtúil	6
11. Measúnú Straitéiseach	8
12. Riachtanais le haghaidh iarratais rathúla	8
13. An Tuarascáil Deiridh	9
14. Leideanna agus Nodanna	10



1. Réamhrá

Tá Coimisiún na Meán (an Coimisiún) ag lorg iarratas ar mhaoiniú deontais le haghaidh tionscnaimh litearthachta sna meáin faoina Mhicri-chiste um Litearthacht sna Meáin le Cur i gCoinne na Bréagaisnéise.

Tá €100,000 san iomlán ar fáil d'eagraíochtaí atá in ann gníomhaíochtaí litearthachta sna meáin a chur ar fáil i gcomhréir leis an [Straitéis Náisiúnta Frith-Bhréagaisnéise](#) (NCDS), a foilsíodh an 17 Aibreán 2025. Seo an dara ceann de dhá ghlaó a eisíodh in 2026. Tá Snáithe A agus Snáithe B i gceist leis an nglao seo ar aighneachtaí.

Féachfar le micridheontais idir €500 agus €3,000 ar a mhéad in aghaidh an iarratais a chur ar fáil faoi Shnáithe A le haghaidh gníomhaíochtaí pobalbhunaithe litearthachta sna meáin. Féachfar le deontais suas le €25,000 ar a mhéad a chur ar fáil faoi Shnáithe B do thionscadail nuálaíochta chomhoibríocha. Más mian leat iarratas a dhéanamh ar thionscadal nuálaíochta comhoibríoch, déan cinnte go dtagraíonn tú d'Fhoirm Iarratais agus do Threoirlínte Shnáithe B.

Cuirtear fáilte faoi Shnáithe A roimh iarratais ó eagraíochtaí agus comhlachtaí atá fréamhaithe i bpobail (grúpaí pobail agus deonacha, lena n-áirítear Comhordaitheoirí Leathanbhanda in Údaráis Áitiúla, Grúpaí Gníomhaíochta Áitiúla agus cláir oiliúna pobail). Ba cheart an maoiniú a fhaightear a úsáid chun gníomhaíochtaí litearthachta sna meáin a fhorbairt, a éascú, a fheabhsú nó a chur ar fáil ar an leibhéal áitiúil. (Féach an rannán 'Maoiniú atá ar fáil' thíos.)

Tugtar eolas cúlra, sonraí faoi Choimisiún na Meán agus a fheidhmeanna reachtúla, achoimre ar na riachtanais incháilitheachta agus mionsonraí faoi na nósanna imeachta iarratais thíos.

Is é 12 meán lae **9 Deireadh Fómhair 2026** an spriocdháta chun iarratais a fháil. Ní ghlacfar le hiarratais dhéanacha ná neamhiomlána.

2. Maidir le Coimisiún na Meán

Is é Coimisiún na Meán gníomhaireacht na hÉireann chun tírdhreach meán atá rathúil, éagsúil, cruthaitheach, sábháilte agus iontaofa a fhorbairt agus a rialáil. Bunaíodh é an 15 Márta 2023 faoi fhorálacha an Achta um Rialáil Sábháilteachta ar Líne agus na Meán, 2022. Áirítear ar a chuid freagrachtaí:

- an córas rialála maidir le sábháilteacht ar líne a chur chun feidhme
- craoltóirí agus soláthraithe seirbhísí físeáin ar éileamh a rialáil
- tacú le hearnáil na meán i gcoitinne

3. Cad is litearthacht sna meáin ann?

Is ionann litearthacht sna meáin agus sraith thábhachtach scileanna chomh maith le heolas a bhíonn de dhíth ar dhuine chun a b(h)ealach a dhéanamh trí thimpeallacht chasta faisnéise. Gné bhunriachtanach den litearthacht sna meáin is ea an cumas ábhar sna meáin a thuiscint agus measúnú criticiúil a dhéanamh air – cibé foinse atá i gceist – chun cinneadh stuama a dhéanamh faoi úsáid na meán. Baineann na



scileanna smaointeoireachta criticiúla sin go dlúth le hionracas faisnéise a chaomhnú agus táthar ag aithint de réir a chéile gur uirlis í an litearthacht sna meáin chun cabhrú le cur i gcoinne na bréagaisnéise. Chun tuilleadh eolais a fháil faoi litearthacht sna meáin, féach ar [Litearthacht sna Meáin in Éirinn](#), [Bíodh Tuiscint Agat ar na Meáin](#), ar an [mBeartas um Litearthacht sna Meáin](#) agus ar [Coimisiún na Meán](#).

4. Comhthéacs an Mhicri-chiste um Litearthacht sna Meáin le Cur i gCoinne na Bréagaisnéise

Sa [Straitéis Náisiúnta Frith-Bhréagaisnéise \(NCDS\)](#), a d'fhoilsigh an Roinn Cultúir, Cumarsáide agus Spóirt an 17 Aibreán 2025, leagtar béim ar litearthacht sna meáin agus croíscileanna criticiúla a chur chun cinn mar shásra tábhachtach chun cur i gcoinne na bréagaisnéise. Mar chuid de Bhuiséad 2026, leithdháileadh €1.1 milliún chun tacú le cur chun feidhme na straitéise trí thionscnaimh lena n-áirítear taighde, litearthacht sna meáin agus seiceáil fíricí. Tá seoladh an Mhicri-chiste um Litearthacht sna Meáin le Cur i gCoinne na Bréagaisnéise ina chuid de chur chun feidhme na straitéise. Is é aidhm an Mhicri-chiste um Litearthacht sna Meáin le Cur i gCoinne na Bréagaisnéise tacú le grúpaí pobail agus deonacha chun gníomhaíochtaí litearthachta sna meáin a chuirtear ar siúl i bpearsa a fhorbairt, a éascú nó a fheabhsú ar an leibhéal áitiúil.

5. Cuspóirí

Dáilfidh Coimisiún na Meán maoiniú chun tacú le gníomhaíochtaí litearthachta sna meáin i gcomhréir leis an NCDS, faoi Ghealltanas 4 'cur chuige fad saoil a ghlacadh i leith cumas litearthachta sna meáin a thabhairt do gach saoránach'. Ba cheart go rannchuideodh na gníomhaíochtaí le cur i gcoinne na bréagaisnéise ar cheann amháin ar a laghad de na bealaí seo a leanas:

- Trí theacht aniar agus muinín a chothú ar leibhéal an duine aonair agus leibhéal na sochaí **agus/nó**
- Trí níos mó comhair, comhoibrithe agus comhordaithe **agus/nó**
- Trí fhrithbhearta agus idirghabhálacha atá bunaithe ar fhianaise

6. Incháilitheacht

Glacfar le haighneachtaí ó eagraíochtaí amhail eagraíochtaí pobail agus deonacha, scoileanna, leabharlanna, oifigí forbartha áitiúla, eagraíochtaí na sochaí sibhialta, eagraíochtaí neamhrialtasacha, fiontair shóisialta, grúpaí reiligiúnacha, clubanna spóirt, Grúpaí Gníomhaíochta Áitiúla agus clár oiliúna pobail a chomhlíonann na critéir incháilitheachta seo a leanas:

- atá bunaithe in Éirinn nó san Aontas Eorpach **agus**
- a bhfuil teist chruthaithe acu ar thionscadail nó tionscnaimh den chineál céanna a chur i gcrích **agus**
- a bhfuil caidreamh seanbhunaithe acu leis an spriocphobal

Chun bheith incháilithe, ní mór d'eagraíochtaí a bheith in ann freisin

- gníomhaíochtaí a reáchtáil i bpearsa
- gealltanas a thabhairt achoimre tionscadail a chur ar fáil, lena n-áirítear meastóireacht (m.sh. aiseolas, athbhreithniú)



Níl daoine aonair **incháilithe** chun aighneacht a dhéanamh.

7. Maoiniú atá ar fáil agus samplaí de ghníomhaíochtaí

Tá sé mar aidhm ag an gciste seo tacaíocht a thabhairt d'eagraíochtaí pobail agus deonacha chun **gníomhaíochtaí litearthachta sna meáin a chur ar fáil i bpearsa**, trí mhicridheontais idir €500 agus €3,000 ar a mhéad in aghaidh na heagraíochta. Ní mór gníomhaíochtaí a reáchtáil go pearsanta in Éirinn agus ní mór iad a bheith saor in aisce do rannpháirtithe. Tá iarratais á lorg ó gach contae ar fud na tíre.

Tá €100,000 san iomlán ar fáil do thionscnaimh nua agus do thionscadail atá ann cheana chun gníomhaíochtaí a reáchtáil níos minice. Níor cheart tús a chur le haon ghníomhaíochtaí sula bhfaightear an maoiniú.

Áirítear iad seo a leanas ar na samplaí féideartha, ach ní liosta uileghabhálach é seo:

- Imeachtaí múscaillte feasachta faoi thionchar na mífhaisnéise agus na bréagaisnéise ar do phobal.
- Clinicí buail isteach, caiféanna pobail agus moil lena gcothaítear scileanna litearthachta digití (m.sh. conas mífhaisnéis agus bréagaisnéis a aithint agus conas camscéimeanna a sheachaint).
- Cainteanna nó cur i láthair ó shaineolaithe ar litearthacht sna meáin, ar sheiceáil fíricí nó ar mhífhaisnéis agus bréagaisnéis.
- Taispeántais agus/nó acmhainní clóite a fhorbairt i spásanna pobail (m.sh. feasacht a mhúscaillt ar na rioscaí a bhaineann le mífhaisnéis agus bréagaisnéis).
- Ceardlanna pobalbhunaithe a fhorbairt agus a chur ar fáil maidir le litearthacht sna meáin, faisnéis a fhíorú agus smaointeoireacht chriticiúil a chur chun cinn (m.sh. teachtaireacht 'Stop, Smaoinigh, Seiceáil' agus acmhainní [Bíodh Tuiscint Agat ar na Meáin](#) a úsáid).
- Oiliúnóirí/éascaitheoirí litearthachta sna meáin a aithint agus a fhorbairt i do phobal.

Ar na samplaí de ghníomhaíochtaí nach féidir tacú leo faoin nglao seo tá scannáin, cláir theilifíse nó raidió a léiriú, podchraoltaí a thaifeadadh agus/nó urraíocht a dhéanamh ar ghníomhaíochtaí. Maidir le deiseanna sna réimsí ag deireadh an liosta sin, d'fhéadfadh spéis a bheith agat inár gcláir mhaoinithe eile.

D'fhéadfadh costais phearsanra (m.sh. d'oiliúnóirí, cainteoirí agus éascaitheoirí), costais chlódóireachta, lónadóireacht, tae/caife do rannpháirtithe, costais taistil agus, i gcúinsí sonracha teoranta, costais chaipitil a bheith i measc na gcostas incháilithe.

8. Cad iad na riachtanais chun iarratas a dhéanamh?

- Ní fhéadfaidh gach grúpa nó brainse áitiúil d'eagraíocht ach iarratas amháin a chur isteach.
- Foirm iarratais atá comhlánaithe ina hiomláine, ní mór gach roinn a chomhlánú.
- Dearbhú sínithe go bhfuil Treoirínte ábhartha Scéim an Mhicri-chiste um Litearthacht sna Meáin d'iarratasóirí léite ag an iarratasóir agus go dtuigeann sé iad (cuid den fhoirm iarratais).
- Dearbhú sínithe maidir le Saoráil Faisnéise agus Faisnéis Íogair (cuid den fhoirm iarratais).
- Nochtadh Sínithe maidir le Coinbhleachtaí Leasa (cuid den fhoirm iarratais).
- Ní mór iarratais a chur isteach trí Microsoft Forms.



- Ní mór iarratais a bheith faighte faoin spriocdháta, is é sin 12 meán lae ar 9 Deireadh Fómhair 2026. Ní ghlacfar le hiarratais dhéanacha ná neamhiomlána.
- Ba cheart a léiriú san iarratas conas a chuideoidh forbairt scileanna litearthachta sna meáin le cur i gcoinne na mífhaisnéise agus na bréagaisnéise (féach Caibidil 4 den [NCDS](#)).
- Déanfar dátaí críochnaithe na ngníomhaíochtaí a mheas agus a chomhaontú de réir gach cáis ar leith, ach ní mór gníomhaíochtaí a chur i gcrích laistigh de shé mhí ar a mhéad ó dhéanamh an chonartha.

9. An próiseas iarratais / Cad a tharlaíonn tar éis dom m'iarratas a chur isteach?

- Cuireann tú iarratas comhlánaithe isteach faoin spriocdháta.
- Chun a chinntiú go bhfuil an t-iarratas incháilithe do mhaoiniú faoin gclár, seiceálfar é lena dheimhniú gur comhlíonadh na critéir íosta agus gur cuireadh isteach an doiciméadacht/an fhaisnéis riachtanach ar fad. Féach thuas le haghaidh tuilleadh sonraí.
- Déanfaidh Coimisiún na Meán measúnú ar na hiarratais. Déanfaidh painéal saineolaithe measúnú ar na haighneachtaí a gheofar faoin spriocdháta sonraithe agus a chomhlíonann na critéir incháilitheachta agus na teoracha a leagtar amach maidir le haighneachtaí. Féach thíos le haghaidh tuilleadh sonraí.
- Tairgfídh Coimisiún na Meán maoiniú do na tionscadail is airde scór a chomhlíonann na critéir.
- Déanfaidh Coimisiún na Meán conradh leat. Féach thíos le haghaidh sonraí. Beidh ort deimhniú cánach a sheoladh ag an gcéim seo.
- Cuirfidh tú an tionscnamh ar fáil mar atá leagtha amach sa litir chomhaontaithe.
- Cuirfidh tú tuarascáil deiridh nach faide ná dhá leathanach isteach ar ríomhphost. Féach thíos le haghaidh sonraí.

10. Measúnú Cáilíochtúil

Déanfar measúnú ar gach iarratas de réir a fhiúntais féin i gcomhthéacs na gcritéir measúnaithe thíos.

Critéir an Mheasúnaithe	Pointí le cur san áireamh	Marcanna ar fáil %	Scór íosta riachtanach %
An ghníomhaíocht atá beartaithe leis an spriocghrúpa: An cumas atá ag an tionscadal tacú le forbairt scileanna litearthachta sna meáin d'fhonn	• An dtugtar cur síos soiléir ar an tionscadal agus an bhfuil sé réalaíoch? • An bhfuil an spriocghrúpa sainithe go soiléir? • An bhfuil an ghníomhaíocht inrochtana agus ionchuimsitheach, agus an	40	24



cur i gcoinne na bréagaisnéise mar atá leagtha amach sa NCDS.	gcuirtear tacaíocht ar fáil do dhaoine a mbíonn bacainní ar a rannpháirtíocht rompu? An dtacaíonn an tionscadal le forbairt scileanna litearthachta sna meáin d'fhonn cur i gcoinne na bréagaisnéise mar atá leagtha amach sa NCDS?		
Achar ama agus bainistíocht tionscadail.	- An bhfuil an t-achar ama don ghníomhaíocht bheartaithe réalaíoch? - An bhfuil an próiseas bainistíochta tionscadail réalaíoch? - An bhfuil an scil agus/nó an taithí shásúil ag an mbainisteoir tionscadail beartaithe?	10	6
Miondealú ar an mbuiséad.	- Ar chuir an t-iarratasóir buiséad soiléir, réalaíoch agus indéanta isteach? - An léirítear go héifeachtach san iarratas go mbainfear luach ar airgead amach?	20	12
Pearsanra: Taithí ábhartha agus cuntas teiste na ndaoine a bheidh páirteach sa ghníomhaíocht bheartaithe a fhorbairt agus a chur ar fáil.	An bhfuil cáilíochtaí agus taithí an phearsanra oiriúnach don tionscadal beartaithe?	20	12
Meastóireacht ar an tionscadal: Tiomantas d'achomre tionscadail, lena n-áirítear meastóireacht/aiseolas, a chur ar fáil.	An bhfuil cur chuige sa tionscadal chun athbhreithniú a dhéanamh ar an ngníomhaíocht, mar aon le tiomantas d'achomre tionscadail, lena n-áirítear meastóireacht/aiseolas, a chur ar fáil?	10	6
Iomlán		100	60



11. Measúnú Straitéiseach

I gcásanna ina bhfuil níos mó iarratas cáilitheach ná cistí ar fáil, beidh an dara céim mheastóireachta ann. D'fhéadfaí cothromaíocht gheografach ar fud na nÚdarás Áitiúil, an spriocphobal, réim an tionscnaimh, an inbhuanaitheacht agus an inscálaitheacht a áireamh sna critéir don mheasúnú straitéiseach.

12. Riachtanais le haghaidh iarratais rathúla

Conradh/Comhaontú: Tá gach tairiscint ar Mhaoiniú faoin Micri-chiste um Litearthacht sna Meáin le Cur i gCoinne na Bréagaisnéise faoi réir an tairiscint a bheith glactha go foirmiúil ag na hiarratasóirí agus comhaontú a bheith curtha i gcrích acu le Coimisiún na Meán laistigh de na tréimhsí ama arna sonrú ag an gCoimisiún agus tráth nach déanaí ná an dáta a bhfuil an t-imeacht nó an ghníomhaíocht urraithe le bheith ar siúl.

Nuair a chuirfear comhaontú i gcrích, íocfar sciar tosaigh den mhaoiniú leithdháilte don litearthacht sna meáin. Chun an maoiniú atá fágtha a tharraingt anuas, ní mór d'iarratasóirí téarmaí an chomhaontaithe a chomhlíonadh ina n-iomláine. Áirítear ar na riachtanais na táirgí insoláthartha riachtanacha uile a leagtar amach sa chomhaontú a chur isteach ar chaighdeán sásúil.

Féadfar tairiscintí maoinithe a tharraingt siar mura dtéann iarratasóir rathúil i dteagmháil leis an gCoimisiún chun comhaontú a thabhairt chun críche roimh an imeacht/ngníomhaíocht bheartaithe agus de réir na dtréimhsí ama comhaontaithe.

Ina theannta sin, tabhair an méid seo a leanas faoi deara:

Tarraingt anuas an mhaoinithe: Go ginearálta, íocfar an maoiniú ón Micri-chiste um Litearthacht sna Meáin le Cur i gCoinne na Bréagaisnéise ina dhá sciar agus comhaontófar céatadán an mhaoinithe i ngach sciar le linn caibidlíocht conartha/comhaontaithe idir an t-iarratasóir rathúil agus Coimisiún na Meán. Mar threoir, meastar go mbeidh an chéad sciar den mhaoiniú idir 80% agus 90%.

Cuntas bainc: Ní fhéadfar maoiniú a íoc ach isteach i gcuntas bainc ar leith don ghníomhaíocht. Ní mór don ainm ar an gcuntas bainc teacht le hainm an iarratasóra rathúil, agus beidh litir gan aon fhritháireamh ón mbanc ábhartha ag teastáil.

Ráiteas Deiridh ar Chostais: Ní mór d'iarratasóirí rathúla ráiteas deiridh mionsonraithe costas, mar aon le cóipeanna de shonraisc agus admhálacha mar chruthúnas ar chaiteachas, a chur isteach. Ní mór don iarratasóir é seo a shíniú. Déanfar an ráiteas costas a athbhreithniú i gcomparáid leis an mbuiséad ceadaithe.

Imríteach cánach: Ní mór d'iarratasóirí rathúla uimhreacha rochtana cánach agus uimhreacha tagartha cánach a chur faoi bhráid Choimisiún na Meán chun comhlíontacht cánach a léiriú sular féidir aon mhaoiniú faoin Micri-chiste um Litearthacht sna Meáin a eisiúint.



CBL: Ní mór d'iaratasóirí rathúla atá cláraithe le haghaidh CBL sonraisc bhailí CBL a eisiúint chuig Coimisiún na Meán chun maoiniú faoin Micri-chiste um Litearthacht sna Meáin a fháil.

Saoráil Faisnéise: Tá Coimisiún na Meán faoi réir an Achta um Shaoráil Faisnéise, 2014. Faoin Acht seo, féadfaidh Coimisiún na Meán faisnéis a chuireann tú ar fáil i d'aighneacht nó le linn do chonartha/chomhaontaithe a chur ar fáil nuair a iarrtar sin. Mar sin féin, geallann Coimisiún na Meán aon fhaisnéis a chuireann tú ar fáil a choinneáil faoi rún nuair a shainaithníonn tú í mar fhaisnéis atá fogair ó thaobh na tráchtála de, faoi réir oibleagáidí Choimisiún na Meán faoin dlí, lena n-áirítear an tAcht um Shaoráil Faisnéise.

Cosaint Sonraí: Comhlíonfaidh Coimisiún na Meán a oibleagáidí faoin mBille um Chosaint Sonraí, 2018 agus faoi aon dlíthe agus rialacháin infheidhme eile maidir le príobháideacht sonraí.

Mionaoisigh: Má bhaineann an ghníomhaíocht le mionaoisigh, lorgóidh Coimisiún na Meán dearbhuithe agus fianaise go mbeidh bearta cuí cosanta i bhfeidhm má bhronntar maoiniú ar an tionscnamh.

13. An Tuarascáil Deiridh

Is príomhghné den Mhicri-chiste um Litearthacht sna Meáin le Cur i gCoinne na Bréagaisnéise í an Tuarascáil Deiridh. Is é cuspóir na Tuarascála Deiridh cuntas a thabhairt ar an ngníomhaíocht agus ar an meastóireacht a rinneadh. Ba cheart di an méid a bhí i do chomhaontú leis an gCoimisiún a léiriú agus léargas foriomlán a thabhairt ar an ngníomhaíocht agus ar an tionchar a bhí aici ar an spriocghrúpa. Níor cheart don tuarascáil a bheith níos faide ná dhá leathanach, cé gur féidir aguisíní a chur léi (m.sh. teimpléid suirbhé, táblaí, grianghraif).

Ar a laghad, ba cheart an fhaisnéis seo a leanas a bheith inti:

- Cérbh é an spriocphobal?
- Cad a rinne tú? Tabhair sonraí faoi na gníomhaíochtaí, lena n-áirítear líon na rannpháirtithe agus líon na n-imeachtaí.
- Cé a bhain tairbhe as agus conas? Cad iad na torthaí a bhí ann?
- Cé eile a bhí páirteach sa ghníomhaíocht? Ar oibrigh tú i gcomhar le haon duine nó le haon eagraíocht eile?
- Cad air a chaith tú an deontas?
- Cad a d'oibrigh go maith? An ndéanfa arís é agus, dá ndéanfa, cad a dhéanfa ar bhealach difriúil?

In éineacht leis an Tuarascáil Deiridh, beidh ort ráiteas deiridh mionsonraithe costas, mar aon le cóipeanna de shonraisc agus admhálacha mar chruthúnas ar chaiteachtas, a chur ar fáil.

Cuimhnigh:

- Ní mór Foirm na Tuarascála Deiridh a chur faoi bhráid Choimisiún na Meán faoin spriocdháta sonraithe.
- Is coinníoll maoinithe é an doiciméadacht deiridh faoin tionscadal a chur isteach,



- Mura gcuireann tú do Thuarascáil Deiridh isteach faoin spriocdháta, tá an baol ann go gcaillfidh tú d'íocaíocht deiridh.

14. Leideanna agus Nodanna

- Cuir eolas maith ar an [Straitéis Náisiúnta Frith-Bhréagaisnéise](#) (NCDS) (leathanach 27).
- Cuir eolas maith ar an [Beartas um Litearthacht sna Meáin](#).
- Bí soiléir agus beacht; tá fáilte roimh phointí le hurchair; dá laghad é is amhail is fearr é go minic.
- Tabhair breac-chuntas soiléir ar na tascanna uile agus ar na costais ghaolmhara.
- Bí soiléir faoin méid is mian leat a bhaint amach agus faoi do spriocghrúpa.
- Seiceáil go bhfuil gach roinn den Fhoirm Iarratais comhlánaithe sula gcuirtear isteach í.
- Smaoinigh ar theagmháil a dhéanamh le [Litearthacht sna Meáin, Éire](#) (MLI) sula ndéanfaidh tú iarratas. D'fhéadfadh MLI cabhrú leat acmhainní iontaofa a shainaitheint nó tú a threorú chuig eagraíochtaí eile atá i mbun obair den chineál céanna nó obair chomhlántach.
- Smaoinigh ar chuairt a thabhairt ar shuíomhanna gréasáin [Litearthacht sna Meáin, Éire](#) agus [Bíodh Tuiscint Agat ar na Meáin](#) chun teacht ar acmhainní a thacaíonn le forbairt scileanna litearthachta sna meáin agus ar shamplaí de ghníomhaíochtaí a d'fhéadfadh cabhrú le do thionscadal.
- Táimid ag lorg tiomantas soiléir don mheastóireacht, seachas torthaí na meastóireachta. D'fhéadfaí agallaimh roimh an ngníomhaíocht agus ina diaidh, suirbhéanna, srl. a áireamh sa mheastóireacht.
- Smaoinigh ar chuairt a thabhairt ar shuíomh gréasáin [Choimisiún na Meán](#).
- Iarr cúnamh más gá. Tá foireann Litearthachta sna Meáin agus Oideachais Úsáideoirí Choimisiún na Meán ar fáil chun aon cheisteanna faoin gCiste seo a fhreagairt. Chun teagmháil a dhéanamh linn, seol ríomhphost chuig usereducation@cnam.ie.
- Reáchtálfar seimineár gréasáin ar an 16 Meán Fómhair chun an próiseas iarratais a phlé agus aon cheisteanna ginearálta a fhreagairt.

